

摘藻堂四庫全書薈要

集部

欽定四庫全書薈要

集部

御選明詩卷七十三

詳校官原任主事臣李斯咏

欽定四庫全書薈要卷一萬八千五百七十三

集部

御選明詩卷七十三

七言律詩六

王偁

過舊遊有感

溼雲如醉護輕塵黃蜨東風滿四鄰
新綠只疑銷晚黛落紅猶記掩歌唇
舞樓西去空殘日月榭香飄不見人
欲覓梨雲仙夢遠坐臨芳沼獨傷神

宿巴陵聞笛

玉笛飄殘月下聲空江秋入思冥冥怪來楊柳移關塞
可是梅花落洞庭半夜旅魂隨調切誰家少婦倚樓聽
曉來更覓龍吟處一點君山水面青

山中送陳生歸海上

洞口花飛春欲闌玉缸攜酒送君還三年厭見天涯月
千里歸尋海上山壯志功名看髮變浮雲世事與心閒
要知別後相思意萬壑松濤嬾閉關

憑祥道中遇元夕

曾向蓬萊捧玉觴
良宵湛露沐恩光
鳳笙曲奏梨園譜
鰲背燈開火樹芳
往事別來生旅恨
流年老去在他鄉
夷歌蠻舞誰能解
馬上看山夜未央

王恭

吳城懷古

姑蘇城下刺蘭橈
却憶吳王古市朝
香輦路邊春寂寂
館娃宮外草蕭蕭
千年往事空啼鳥
半夜疎鐘自落潮

明發不堪回首處
暝煙秋雨過楓橋

題彭韞玉秋山行旅圖

閒門秋晚葉皆飛
征路逢霜客漸稀
獨樹斷猿愁遠騎
隔林殘燒映征衣
西風一飯人煙少
落日千峰夕鳥微
莫向他鄉留滯久
故園山水候君歸

初秋寄清江林崇高先輩

十年滄海寄萍蹤
迢遞鄉山思萬重
烏外明河秋一葉
天涯涼月夜千峯
心知久別魂應斷
生事中年夢亦慵

無限相思何處著越山仙島樹蒙茸

送別林彥時之建上

黃葉紛紛秋滿天故人今夜惜離筵
他鄉見月長為客別路逢霜半在船
劒浦綠蕪連晚燒幔亭荒樹帶寒煙
明朝碧水丹山下知爾相思若箇邊

道人延翠軒

山水嬋娟埽黛屏清輝迢遞到柴扃
雲歸獨樹天邊小雪罷孤峰鳥外青
寒蘚帶花侵卷幔野泉流葉近閒庭

浮生只解人間事，未得從師種茯苓。

沙堤燕集次韻荅王介軒黃嗣傑

滄洲沙館共歡攜，紅燭青尊月易西。
孤客獨憐萍尚泛，幽期那似鶴同栖。
霜飄敗葉催殘臘，鴈引寒聲入夜溪。
何事故人俱斷酒，風流佳句若為題。

梅城夜泊

澤國秋風旅鴈飛，海天愁思正依依。
孤城背嶺聞吹笛，白露橫江卧溼衣。
砧杵遠村寒事早，市橋殘火夜漁歸。

興來且醉梅江月
遮莫鄉原落夢微

行次海上

曉風吹酒動離顏
別路蕭條草樹間
積水亂流疑夢渚
一峰中斷似君山
雞鳴海曙寒潮小
鴈引秋聲落葉閒
行李飄飄何處往
暮雲飛鳥倦知還

送陳自立遊古田

孤舟何處興堪攜
紅樹千山野水西
別路鴻聲天外小
荒江帆影望中迷
到樓殘笛兼秋聽
向壁新詩倚醉題

我有相思寄流水寒潮惟到白沙谿

高棟

酬林一和閒齋見懷之作

東山遙夜鴈歸聲
兩地相思舊感生
芳草白雲無那別
春風黃鳥若為情
雙谿日下鷗波靜
獨樹原頭獵火明
誰道離居成寂莫
好文地主久知名

擬奉和早朝之作

明光漏盡曉寒催
長樂疎鐘度鳳臺
月隱禁城雙闕迴

雲迎仙仗九重開
旌旗半掩天河落
閭闔平分曙色來
朝罷珮聲花外轉
回看佳氣滿蓬萊

得鄭二宣海南手札

番禺天外古交州
念子南行戀舊遊
故國又經花落後
遠書翻寄鴈來秋
梅邊野飯逢人少
海上青山對客愁
為報羅浮雲影道
早隨明月引歸舟

擬蘇許公頤侍宴安樂公主新宅應制

飛構雲邊帝子家
宸遊天上駐仙車
玉杯春醉平陽館

銀漢秋行博望查萬樹芳花迎日吐千條弱柳向風斜
皇情愛物歡無極能使羣心戀翠華

王哀

越臺

越臺草綠鷓鴣飛劍化龍津事已非故國遺臣空北望
異鄉作客獨南歸新祠海上經秋雨舊業林間半掩扉
讀罷遺文腸欲斷桐城何處一沾衣

王紱

靜趣軒

竹樹陰森映短牆
蕭然絕俗似僧房
出城相去路三里
閉戶獨眠書半牀
風暖林花飄几席
雨晴沙鳥入池塘
慙余擾擾紅塵客
到此猶能百慮忘

送陳尚賓還靖州

嗟余湖海度年華
爾復飄零更可嗟
舊業暫歸翻似客
異鄉重到即為家
江連雲夢孤帆遠
日落衡湘斷鴈斜
後夜月明何處泊
相思回首各天涯

梁潛

盧溝曉月

疎星寥落曉寒淒
月色沙光入望迷
野戍連雲寒見鴈
人家隔水遠聞雞
波間素彩涵秋淨
天際清光映樹低
馬上曾驚殘夢斷
鐘聲遙度禁城西

金臺夕照

高臺曾此置黃金
人去臺空碧草深
落日未窮千里望
青山遙映半城陰
鴈將秋色來平野
雅帶寒光過遠林

昭代賢才登用盡不須懷古動長吟

太液晴波

蓬島前頭太液池搖風漾日動漣漪魚龜已慣迎仙舫
鷗鷺應能識翠旂著雨錦蕖開曉鏡拂煙翠柳曳晴絲
周人自昔歌靈沼願沐恩波一獻詩

元夜隨駕燕午門

銀漢橫空寶月圓六鰲飛出五雲端蓬萊紫氣天中起
玉井紅蓮地上看滿殿嬌歌留夜景千門羯鼓散春寒

教坊戲樂年年異
願奉龍顏萬歲歡

鄒緝

玉泉垂虹

碧嶂雲巖噴玉泉
平流寧似瀑流懸
遙看素練明秋壑
却訝晴虹飲碧川
飛沫拂林空翠溼
跳波濺石碎珠圓
傳聞絕頂芙蓉殿
猶記明昌避暑年

曾烜

寄友人

與君離闊十年餘兩過江濱候起居咫尺猶如千里別
飄零不寄一行書何時夏口同傾蓋此日王門好曳裾
若問故人何似者髣髴絲今已不勝梳

黃守

題燕文貴秋山蕭寺圖

迴厓列岫鬱相連兜率樓臺際碧天飛鳥已還秋色裏
疎鐘猶在夕陽邊溪橋緩轡官人馬野飯維梢客子船
記得宦遊逢此景披圖不覺思茫然

送胡學士楊金二侍講扈駕北伐

六師北伐繞龍城
遙羨詞臣扈蹕行
兵畧曾從圯上得
檄書多向御前成
黃沙白草雲隨馬
畫戟雕戈雪照營
應想居庸關外路
東風歸旆凱歌聲

熊直

送邊將還舊鎮

易水長城本舊丘
旌旗西上路悠悠
朝吹出塞羌胡笛
夜坐籌邊古戍樓
飲馬直從青海上
射雕還過黑山頭

玉門關外思歸老定遠應辭萬戶侯

陳繼

秋晚過西菴

游吟何處最宜頻
谷木溪西第一鄰
竹逕清風啼黠鳥
柴門落日對閒人
穿雲漸覺香裘重
照水惟憐白髮新
常得杖藜隨去住
不須琴酌在芳春

偶成

野性耽迂百念輕
幽棲隨處得怡情
山依南郭家林好

水入西莊客舍清暖日野花常護鹿春風汀柳不辭鶯
年來夢裏添游樂也逐漁樵結伴行

賦得江天暮雪送友人之官

漠漠江天黯黯雲晚風吹雪正紛紛籠寒已禁猿爭語
傍夕空教鴈失羣影帶楚蘭看不見聲連湘竹聽還聞
太平未必堪成瑞一向誰憐好似君

錢紳

舟泊常州

舟到毘陵日已昏維舟柳下宿西門幾家燈火橋邊市
一曲漁歌郭外村遠樹依微寒鳥集古城寥落暮雲屯
相親喜有同袍客吟得新詩可細論

陳亢宗

賜午門觀燈應制二首

鰲峯千仞鬱嵯峨萬蠟榮春洽太和明月只隨仙仗轉
紅雲偏近御筵多旌旄影颺黃金闕絲竹聲翻白雪歌
萬歲三呼頻祝頌醉歸數問夜如何

白玉仙京上帝家六龍遙駕五雲車巨鼇此夕移三島
火樹迎春吐萬花水咽宮壺留夜色歡騰黎庶樂年華
承恩盡醉歸來晚一派鈞天隔彩霞

送友人歸崑山

官亭把酒送君歸回首吳山驛路微久別方期同笑語
相逢那忍又分違平蕪積雨迷征騎疎柳寒煙掩舊扉
此去思親還望闕朝朝應對白雲飛

題朱澤民秀野軒圖

短棹曾經錦里過，高軒虛敞煙蘿溪。
浮淨碧澄寒綠，山送遙青疊翠螺。
松雨來時涼吹急，梅花香處白雲多。
畫橋東隔龍池近，碧殿陰陰俯澗阿。

袁廷玉

題張得中江村書屋

一江流水繞村長，煙樹依微帶夕陽。
不是季真湖上宅，定應子美瀼西堂。
閉門讀易潮平岸，刻燭吟詩酒滿觴。
他日東歸訪幽勝，瑤琴為我奏清商。

郭武

寄劉草牕原博

空堂獨坐葉紛紛一鴈南飛不可聞
野色連天迷遠望高城落日亂寒雲
故人眼底無多在客思秋來又幾分
莫怪臨風倍惆悵江鄉猶記白鷗羣

沐昂

送胡橙軒還永昌

有客乘驂過洱西平原春草正萋萋
人煙迢遞連金齒

山勢逶迤拱碧雞
流水小橋楊柳綠
落花微雨鷓鴣啼
遙知別後相思處
雲樹蒼茫夢欲迷

曾榮

車駕渡江

朱旗畫戟擁晴沙
錦纜牙樯照浪花
佳氣迴浮江北樹
曉光初絢海東霞
雲中鸞鳳扶丹轂
水底魚龍識翠華
不用臨流羨天塹
只今四海盡為家

駕次江心驛

清蹕初傳日未西
鴻臚將引唱班齊
營門風暖千旗動
輦路雲香萬馬嘶
草綠夜塘多是水
雨晴沙道不成泥
忽傳四鼓鑾輿發
不寐時時聽曉雞

燕京八詠

錄四首

居庸疊翠

重關深鎖白雲收
天際諸峰黛色流
北枕龍沙通絕漠
南臨鳳闕壯神州
煙生睥睨千巖曉
露溼芙蓉萬壑秋
王氣自應成五采
龍文長傍日光浮

玉泉垂虹

跳珠濺玉出巖多盡日寒聲洒碧蘿
秋影涵空翻雪練曉光橫野落銀河
潺湲舊繞芙蓉殿滉漾遙通太液波
更待西湖春浪闊蘭橈來聽濯纓歌

太液晴波

靈沼溶溶淑氣回玉泉初暖碧如苔
風迴鰲背山光動日照龍鱗鏡影開
飛鳥慣隨仙仗過游魚偏識翠華來
願傾池水成春酒添進南山萬歲杯

薊門煙樹

東風綠樹繞郊畿
煙景蒼茫霽曙暉
夾道清陰停遠騎
滿林空翠溼征衣
城邊隱隱行人度
雲際翩翩宿鳥歸
為報春來宜騁望
恐經霜後葉皆飛

海子橋

鯨海遙通一水長
滄波深處石為梁
平鋪碧甃連馳道
倒瀉銀河入苑牆
晴綠乍添垂柳色
春流時泛落花香
微茫迴隔蓬萊島
不放飛塵入建章

送彭巡檢子韶赴閩清兼示光澤舍弟

送君南去片帆歸五月薰風白紵衣路繞閩山征騎遠
月明蠻徼邏兵稀枕椰綠暗經殘雨荔子紅垂映落暉
小弟衫關煩寄語客心常伴鵲鴒飛

新館內直

華館深沉直禁闈彩夢丹碧煥翬飛上林萬樹連西掖
北極諸星拱太微繞硯龍香裁詔罷隔簾鶯語退朝歸
應知幾度青綾夜月轉金莖露滿衣

送陳郎中重使西域二首

曾馳宛馬入神京拜命重為萬里行
河隴壺漿還出候伊西部落總知名
天連白草寒沙遠路繞黃雲古磧平
却憶漢家勞戰伐道旁空築受降城

玉關迢遞塞雲黃西涉流沙道路長
山繞高昌遺碣在草遮姑默廢城荒
靜聽羌笛多乘月暗卷戎衣半帶霜
不用殷勤通譯語相逢總是舊蕃王

別弟憲副鼎

莫向尊前唱渭城
老來離別最傷情
江南渺渺孤舟夢
嶺外迢迢萬里程
驄馬曉嘶霜氣肅
鱸魚夜徙海潮平
到時應及春初候
先報京華白髮兄

春思

鶯啼燕語畫樓東
麗日輕雲護綺櫳
香篆暖飄煙縷碧
花房晴滴露珠紅
纏綿客思王孫草
搖蕩春光少女風
暗想多情惟落絮
時時飛入繡簾中

燭

曾於鴻寶識神方長送清暉入洞房
心到成灰辭綺席
花如吐豔照紅妝
畫屏掩月兼秋冷
紫陌朝天雜曙光
幾度似應憐遠別
向人深夜淚成行

蟬

性潔應知飲露清
翠綃為翼蛻來輕
高高殘雨淒清韻
疎柳斜陽斷續聲
逐髻巧添歌女媚
製冠偏助上官榮
長吟不獨能驚夢
更恐秋來動旅情

寄趙公復

江上梅花映酒卮。別來還憶十年時。銀牀碧水陳遵轄。
玉筍青山謝朓詩。湖海舊遊心尚在。風霜暮景鬢先衰。
兩京迢遞書難寄。況未逢秋鴈到遲。

送高陽令呂蓋宗

闕下逢君屬孟春。明朝又是別愁新。金臺晴日雙鳬影。
紫陌東風匹馬塵。楊柳半青遙送客。蘼蕪初綠重懷人。
高陽還似中年好。滿地桑陰野雉馴。

寄贈蕭仲璉兄弟

家臨花縣郭西偏
往日交遊二十年夜雨細論徐孺榻
春雲長染薛濤箋
瑤簫鳳下疑雙璧
銀漢烏飛記八磚
早晚南天鴻北鄉
陽春應有寄來篇

德州

慢城初解向朝暾
霜冷重裘曉未溫
小邑有城皆壘土
荒原無徑可通村
郵亭過客頻詢路
茆屋遷民久下屯
此去景陽州不遠
建牙鳴鼓是營門

陳敬宗

元夕賜觀燈詩三首

河漢沈沈霽景澄
蓬萊然滿九華燈
青猊白象三千界
綺闕雕闌十二層
花繡芙蓉濃豔吐
簾垂翡翠異香凝
世人惟向雲中見
遙望天門不可登

樂奏咸韶寶扇開
遙瞻龍馭自天來
九門香逐靈飈度
萬國春隨御氣回
彩鳳高臨青玉案
彤雲輕護紫霞杯
臣民共願宸遊樂
海內歡聲溢九垓

中使傳宣燕百官
珮聲遙集五雲端
酒傾綠蟻開金甕

饌膾蒼麟奉玉盤
寶帳春回頻送暖
瑤臺雪霽不生寒
侍臣霑醉蒙恩德
更勅都人近御看

王英

寄和楊之宜春早侍宴朝回之作

紫微天近九重開
玉漏聲殘禁鼓催
五色祥雲依黼座
九重春色照金杯
輕風微逐鳴珂散
細柳低迎仗馬回
一曲陽春誰和得
鳳凰池上待君來

朝回宴李君小館有懷

欲寄鄉書過鴈稀
家山長在夢中歸
天連楚澤波聲遠
雪暗交河樹影微
每聽鄰雞馳曉騎
多乘殘月著朝衣
與君退直歸偏晚
把酒相看對夕暉

直禁中次韻

花樹陰陰鳥自啼
從官多在掖垣西
霓旌浮動蒼龍影
御馬行翻碧玉蹄
路入廣寒天語近
涼生金露月華低
幾回得侍宸遊處
兩袖香煙晚更攜

贈李將軍

青春玉帳樹牙旗
浦海風高列陣時
夜逐左賢冰上渡
曉驅番馬雪中騎
功存鐵券書丹字
冠著金貂侍玉墀
誰道廉頗今白髮
指揮猶可萬人師

王直

子弟新軍屯德州候車駕

平原十里候鑾旌
繞郭新屯十萬兵
慣著短衣來小市
常乘驕馬過孤城
營前劒舞春風暖
帳下酣歌夜月明
自是太平無戰鬪
少年何處可橫行

西湖

玉泉東滙浸平沙八月芙蓉尚有花
曲島下通鮫女室晴波深映梵王家
當時鳬雁聞清唳舊日魚龍識翠華
堤下連雲秔稻熟江南風物未宜誇

端午憶上年從幸東苑錫宴

千門晴日散祥煙東苑宸遊憶去年
玉輦乍移雙闕外彩球低度百花前
雲開山色浮仙仗風送鶯聲繞御筵
今日獨醒還北望何時重詠柏梁篇

章敬

送李推官謫湖南

玉陛朝承明主恩，扁舟八月下荆門。
斷煙斜日荒山路，野水寒鴉獨樹村。
江浦潮聲天外遠，衡陽秋色望中昏。
鷓鴣聲裏湘江暮，莫賦離騷恐斷魂。

周忱

車駕渡江

柳色臨江輦路長，歲華遙望翠華張。
衣冠隔岸催鷓鴣，序

舸艦中流列鴈行
魚躍恩波瞻御座
烏啼春樹識天香
時巡百度稽虞典
不奏橫汾禮樂章

李昌祺

賦落花

愁紅怨粉各依依
樹下偏多樹上稀
總為春光爭艷冶
却教夜雨妬芳菲
數枝浸水魚吹去
幾片縈林蝶趁飛
莫怪東風成薄倖
猶能收拾點人衣

孝陵秋日陪祀東彭贊禮永年

鍾山欲曉色蒼蒼小輦輕輿出建章苑鹿不驚仙仗過
潭龍故噴御泉香重城隱霧留殘月高樹含風送早涼
惟有祠官最清貴時來導駕沐恩光

晚春郊外二首

柳外輕風拂面來春忙半是杜鵑催多般野菜參差老
幾樣林花接續開竹為近堦難迸笋松因臨水易生苔
追思往日嬉遊伴聚散如雲倍可哀

雨外林鳩不住啼落紅狼籍半沾泥秧苗帶穀根猶淺

麥幹垂花穗已齊
鷗下只投荷葉嶼
蜨飛多傍菜花畦
青山綠水饒詩景
歸路扶筇醉嬾題

胡謐

秋思

遠客尋常歎索居
秋來懷抱意何如
高城月白砧聲急
古戍霜清木葉疎
塞馬正肥秋苜蓿
江蓴空憶舊鱸魚
故人迢遞天南北
不寄相思尺素書

嚴貞

和柳子厚登柳州城樓

獨上城樓望海天，異鄉愁思正茫然。
溪雲暝帶枕椰雨，野日晴銷薜荔煙。
百粵湖山通絕徼，半江菰米熟秋田。
舊遊別後多零落，目斷滄波祇自憐。

魏驥

辛未歲暮述懷

布襪青鞵雪滿顱，休官林下愜閒居。
心無俗繫身無恙，爐有清香案有書。
山色循檐雲散後，梅香入座雪晴初。

却慙坐享昇平樂屈指將來歲又除

春暮雨雪不止

天上歸來髮已華齋居愁對雨如麻
泥深徑有相過客寒劇庭無可看花
傍砌衝檐飛急溜循牆古木噪殘鴉
逍遙鎮日惟清詠櫺袖頻燒只煮茶

五月一日晚晴閒步

老農歌裏雨新晴曳杖春深款款行
萬疊好山隨處湧一川新漲與堤平
青青柳線牽風舞短短蒲芽貼岸生

二麥如雲喜收盡無人不說比西成

秀野堂

茂林幽嶼繞檐楹花竹紛披照眼明
賓客盈門無俗狀
兒孫終夕有書聲
山容青露雲方斂
芸葉香生雨半晴
詩料滿前吟不盡
神仙何必住蓬瀛

尹鳳岐

送兄廣東參政應奎

介人藩閫寄旬宣
五嶺南行遠著鞭
曉日紅亭留別酒

秋風黃葉下
龍船青連檝
攬千家雨
黃觸枕柳萬井煙
珍重平生清節在不妨引滿酌貪泉

錢幹

和曾學士元日遇雪

急雪飛花滿御堤
朝元紫禁侍班齊
飄來玉珮行偏重
舞落金鋪看欲迷
鐘動城雅翻玉羽
仗回路馬盡霜蹄
高歌郢曲知難和
未數陽春舊日題

馬鐸

送徐主事孟暘回澄江

京華二月柳垂絲
遊子南行惜別離
陌上看山愁對酒
風前握手倦吟詩
雲連鐵甕人煙迴
月滿丹陽客棹遲
粉署嚴程應待汝
莫因鄉國緩來期

陳循

野望二首

遠違車駕踰三月
久抱衾裯滯一州
南郭幽居嗟影獨
西風落日使人愁
天空絕塞飛鴻度
草滿平原獵騎遊

何似桑乾南下水萬山深處出盧溝

欲就邦人詢往事百年耆舊已無存
猿啼暮雨佛山寺鶴怨秋風香水園
萬仞倚天瓊岫小一泓迸石玉泉溫
太平自是多耕牧禾黍牛羊日滿村

東軒

半畝溪山舊卜居往來塵跡事應疎
春風門巷花開後曉閣軒窗日上初
頻理琴尊留上客閒攜燈火讀遺書
時平隱逸皆徵用丹詔行看下玉除

牟倫

留別京師諸友

行行策馬去皇畿
落木高原獨鳥飛
天上故人青眼在
蜀中諸弟素書稀
秋風故隴雲連棧
夜月清笳霜滿衣
白髮蕭蕭身萬里
不知別後竟何依

許彬

送李佑之赴陝西參議

十載含香侍上台
旬宣分陝用奇才
黃河九曲天邊落

華岳三峰馬上來，長樂月明笳鼓靜。
終南雲斂障屏開，行行喜近重陽節。
黃菊飄香入酒杯。

劉鉉

送杜亞卿赴南京

一尊傾罷雨瀟瀟，客思離情總不消。
廿載禁林同侍講，五更青瑣共趨朝。
西風鴻鴈南歸急，落日雲煙北望遙。
此際送君無限意，蕭疎楊柳玉河橋。

薛瑄

重登故鎮寺樓

重來故鎮已三秋，又上招提百尺樓。
山繞飛甍浮翠黛，岸遮遠目斷黃流。
迴溪俯瞰鄰鄰玉，喬木深藏曲曲丘。
莫道此時窮勝概，還期汗漫九垓遊。

無題四首

逸思飄然賦遠遊，可堪三島隔瀛洲。
曾聞神女雲侵髻，見說麻姑雪滿頭。
海上樓臺常似畫，山中瑤草不知秋。
若為借得仙家鶴，鳴珮珊珊玩九州。

桂館瓊扉辟荔牆清修獨爾意難忘已將蘭芷為芳藉
更集芙蓉製錦裳洛浦佳人鳴珮玉茂陵才子詠鸞凰
應須一色仙家酒散作人間雨露香

風滿珠簾月滿樓瑤臺有路可追遊香生寶鴨沈煙細
露滴銀牀玉宇秋楚岫三更雲渺渺藍橋千里浪悠悠
花箋寫就煩青鳥更為殷勤到十洲

絕世青娥二八餘仙容綽約好樓居鮫人夜織綃為帔
雲女秋裁錦作裾碧海蘭苔巢翡翠瑤池清水泛芙蕖

祇應待得吹簫伴共跨飛鸞躡太虛

春日遣興

靄靄春雲度女牆
萋萋春草徧芳塘
園林風景非吾土
庭館鶯花是異鄉
野岸波紋浮鴨綠
官橋柳色弄鵝黃
不知多少相思意
祇逐遊絲百尺長

秋日寄王嘉靖

漁陽秋色動關河
遼右天晴一鴈過
白社高人渾嬾慢
青氊學士又蹉跎
西風對酒砧聲切
良夜調琴月影多

珍重遠書勞問訊相思千里奈情何

卜居後簡陳廣文

轉蓬天地欲何如又向中州買屋居
峴首詩人王粲宅南陽豪傑孔明廬
行藏祇想前賢迹事業惟存往日書
賴有知音陳掌教時能相顧慰蕭疎

沅州雜詩

辰沅風壤帶三苗一望中原萬里遙
翼軫衆星朝北極岷嶓諸嶺導南條
天連巫峽常多雨江過潯陽始上潮

近日詩懷殊浩渺
謾將新句答漁樵

于謙

盤陀驛道中

羣峰盡處是盤陀
小徑紆回亂石多
風約閒雲難作雨
渠分流水不成河
門開野店羣雞唱
花發春山百鳥歌
一段好懷無著處
令人對景費吟哦

春風

蕩漾無端入畫堂
簾櫳微動晝初長
暖催花底鶯聲滑

輕拂檐前燕翅忙
酒醒香塵凝座榻
夢回芳草滿池塘
飄揚不解留春住
又逐鞦韆度粉牆

太原道中曉行

星稀月落曉風清
猶聽雞聲報五更
山勢平吞沙漠境
河流曲繞晉陽城
天涯何處尋歸路
野景無邊動客情
車騎縱橫皆故道
不須候吏遠逢迎

秋夜獨酌

銀燭金尊映畫屏
消愁聊借酒為名
醉來却喜朱顏在

畏老猶嫌白髮生無客可邀惟對影有燈相伴最關情
餘醒未解不成寐起向瑤階月下行

除夕夜坐感懷

秉燭焚香坐不眠夜長難到五更天懷人此際隔千里
為客明朝是十年遠道風霜今老矣故園梅柳想依然
椒盤獻歲知誰共獨把深杯對影傳

秋風

蕭蕭入夜動清商披拂園林草木黃快意埽除天下熱

何人吹送枕邊涼
荻花楓葉愁江渚
莼鱸魚憶故鄉
萬里碧天雲散盡
衝開征鴈不成行

陳禎

和弟景容見寄韻

重把離懷託錦箋
征鴻飛去意茫然
要知客裏愁多少
謾數書中字幾千
汴水春行花夾岸
吳山曉望翠浮煙
情深何似來相見
夜雨挑燈酒共傳

憶蕭山故友

西風吹雨暗書房每憶蕭山別意長馬駐西陵秋樹晚
詩吟東浙夜窗涼石巖晝暖花空好江樹春晴酒自香
何日南來重有約寒驢馱醉過錢塘

陳裕

寄兄景祺

東風無便寄雲箋西望關河思惘然白髮相催年半百
清顏一別路三千杏花門巷聽春雨楊柳樓臺倚暮煙
征鴈已還巢燕至歸期何事又空傳

瞿佑

春日即事

晴日暉暉轉綠蘋
東風應候物華新
歸來燕子已知社
開到海棠方是春
淺碧平添湖面水
軟紅浮動馬蹄塵
杜陵野老雖貧困
援筆猶能賦麗人

暮春有感

美人不見已連朝
況值春殘景寂寥
力不禁風紅芍藥
聲偏宜雨碧芭蕉
尋常路隔疑春樹
萬一書來候晚潮

況是頻頻移帶眼沈郎不復舊時腰

夏晚納涼

竹牀籐簟晚涼天卧看星河小院偏雲影恰如衣暫薄
月華那得扇長圓清泉冷浸冰盤果嘉樹香籠寶鼎煙
想是高樓風更爽玉人閒按十三弦

暮春書事二首

過牆新竹翠交加綠樹陰陰噪乳雅花到酴醾香結局
烏鳴鵲鳩客思家煮茶湯沸風聲轉夢草詩成日影斜

零落殘紅青子滿漸看金彈熟枇杷

睡起呼童埽落花石泉槐火試新茶樹林深處蜂王國
簾幙陰中燕子家柳絮乘風投硯水竹枝搖影落窗紗
幽居莫道無官況鼓吹猶存兩部蛙

題鼓吹續音後

效元遺山唐詩鼓吹取宋金元
三朝律詩得一千二百首號鼓

吹續
音

騷選亡來雅道窮尚於律體見遺風平生莫售穿楊技
十載曾加刻楮功此去未應無伯樂後來當復有揚雄

吟窗玩味韋編絕舉世宗唐恐未公

紅甲

金盆和露搗仙葩解使纖纖玉有瑕一點愁凝鸚鵡喙
十分春上牡丹芽嬌彈粉淚拋紅豆戲掐花枝鏤絳霞
女伴相逢頻借問幾回錯認守宮砂

至松江

投林倦鳥暮知還傍水人家戶半闌煙柳露荷搖動處
岸花檣燕送留間依稀似識城頭鶴彷彿曾遊海上山

張翰有靈應笑問東歸今見一人閒

偶桓

送陳民初歸廣州兼問訊趙知事公傑

靜江遙帶五羊城官舸乘風畫鷁輕客館鄉人秋送別
高齋弟子日相迎枕榔接葉蠻煙暗螺蚌含珠海月明
到郡為詢賢贊府幾時鞍馬定朝京

題燕穆之楚江秋曉圖

七澤蒼茫曙色微眼中風景尚依稀疎林半隱黃陵廟

涼霧初消赤壁磯
波動兼葭涵日出
沙喧鴻鴈帶霜飛
令人却憶曾遊處
濯足中流放棹歸

謝縉

寒食旅懷

簾外春陰似去年
異鄉寒食倍淒然
梨花香褪空飄雪
楊柳條長不禁煙
無處追遊乘款段
誰家歡笑送秋千
晚來走向東鄰媪
乞與青燈照客眠

晚春四首追次楊省菴韻

水淹榆莢半堆牆
細雨生寒潤袷裳
芳草遠迷樓外眼
飛花空斷客邊腸
風簾靜罨餘春絮
煙篆微銷過午香
睡起不知庭院晚
陰陰高柳映殘陽

年來疎散任清貧
藜杖荷衣白葛巾
傍竹看山行怕晚
對花臨水坐傷春
擬將蘭棹為漁父
來訪桃源避世人
回首仙蹤無處覓
東風吹綠半江蘋

移家住近闔閭城
花繞衡門柳拂楹
新社未來先有燕
一春將盡始聞鶯
杯緣醉少長嫌淺
巾為涼多却愛輕

日暮小齋清沐罷科頭閒取一琴橫

節序怱怱改歲華滿庭芳草一池蛙吟髭總為傷春白
病眼長因中酒花夢裏暫歸憑蛺蝶江頭相送憶琵琶
客窗過盡清明日風雨昏昏噪暮鴉

鄧林

保安留別瞿存齋

兩髻西風吹斷蓬杖藜扶病看秋容菊花渾似詩人瘦
山色不如歸興濃紫塞一杯桑落酒彤庭五夜未央鐘

燕鴻歧路東西去此後相思意萬重

平顯

題黃鶴山人王叔明畫

我昔見之湖上居當門萬朶翠芙蓉承平公子有故態
文敏外孫多異書閒吮彩毫消白日夢騎黃鶴上清虛
此圖定倚吳山閣醉點南屏春雨餘

施敬

沙津送客登望江亭

沙市津頭送客行西風江樹數蟬鳴夕陽靄靄千山暝
秋水迢迢雙鷺明蔓草已蕪王粲宅亂雲長繞呂蒙營
登臨不用攜尊酒若箇能平感慨情

李孝謙

送巽上人還台州

挂錫遙憐野寺鐘赤城何處問芙蓉歸心千里月千里
行色一重山一重霞洞春深多藥味石橋雲斷少人蹤
秋風紅葉桃花似此日相期谷口逢

新秋寄德鄰

一雨兼旬水沒塍江村涼思陡然增
鴻來燕去非迎送
扇故衣新豈愛憎
遠戍有書終可到
小樓無賦且須登
不知明日還晴否
船過湖南聽采菱

寄題黃巖張氏隱居

天台佳氣鬱龍蔥
中有留侯慕赤松
繞屋溪聲長落水
對門雲氣悉成峰
果林秋熟猿將子
藥圃春肥鹿長茸
幽討莫辭行路遠
穿雲已辦一枝筇

錢安

喜晴

秋風忽起卷重陰
日色微茫照樹林
野老扶藜看白日
山人伐木度青岑
門前溪水深三尺
牆外竹梢高十尋
明日甕頭新酒熟
且依松下一開襟

劉績

早春寄京師白虛室先生

帝城佳氣接煙霞
草色芊芊紫陌斜
霽雪未消雙鳳闕

春風先入五侯家
歌鐘暗度新豐樹
游騎晴驕上苑花
獨有揚雄才思逸
應傳麗句滿京華

次韻愚士兄壁間留題之作

初聞留大寧後即從李曹公西征

常共鷦鷯守一枝
忽隨搏擊過天池
當君仗劍西遊日
是我登樓北望時
華岳天青雲葉斷
蔥河風黑雪花垂
白身萬里參戎幕
馬上題詩最憶誰

鄭嘉

送辰長老住橫山寺

紫檀煙凝鶴迴翔清磬泠泠出上方岸畔異花熏講席
澗邊修竹護禪房東林結社蓮初種南岳分春茗乍香
三伏炎蒸應不到綠蘿風洒石龕涼

趙宗文

送姜公實還汝陽同知是日飲餞至曉始別

酒醒江館夜燈微故舊殷勤不忍違孤棹近從滄海發
一官獨向汝陽歸雲開遠浦青山曉霜落空江野樹稀
明日相思成兩地西風愁見塞鴻飛

清明道中書懷

東風道上亂開花
游子偏驚見物華
寒食已過嗟在客
春衣將換憶還家
山城樹暗人逾靜
野店鶯啼日未斜
空約同遊與諸弟
今朝猶自各天涯

竹深處詩

帶雨含煙碧玉枝
蕭森偏與靜相宜
風生萬壑秋無際
月到孤亭客未知
遠憶楚山吹笛夜
迴疑湘水泊舟時
此君自昔持高節
長結幽人歲晚期

錢遜

春詞二首

宿靄溟濛曙色新
牡丹凝露曉妝勻
樓臺乳燕輕翻雨
簾幕遊絲不動塵
黃鳥喚醒中酒睡
綠窗愁損惜花人
軟紅深徑香埃裏
走馬題詩正及春

紅杏蕭牆翠柳遮
重門深鎖屬誰家
日長亭館人初散
風細鞦韆影半斜
滿地綠陰飛燕子
一簾晴雪卷楊花
玉樓有客猶中酒
笑撥沈煙索煮茶

陳觀

九日陪李上猶登高

百年能幾過重陽
逐伴登高引興長
邑宰喜陪元亮飲
參軍那似孟嘉狂
山雲映水搖秋色
浦樹含風送晚涼
滿路黃花應笑我
白頭猶自客他鄉

朱絀

題淘金驛丞謝子良清隱書房

驛官近日逢迎少
清隱何妨結草堂
門對好山蒼霧溼

窗連修竹翠雲涼
侍童解誦閒居賦
過客求書急就章
愧我驅馳塵滿面
濯纓為爾詠滄浪

雨中過韶州

船下韶龍日欲晡
四山雲起漸模糊
沙鷗衝浪頻來往
汀樹迷煙半有無
作客又驚三月暮
思家其奈一身孤
愁懷結轡渾如醉
獨倚篷窗聽鷓鴣

李進

同陳劉二掌教遊湖作

湖光潋滟鳥間關小棹夷猶意獨閒春正好時初過雨
望中佳處惜無山花明遠岸青旗出柳拂微風畫舫還
四美由來俱不易人生莫遣髭毛斑

姚黼

寄景伊文學

憶昨逢君四月初笑談懷抱最相符朝乘白下看花騎
暮醉長安賣酒壚別去江山頻悵望歸來松菊未荒蕪
登臨日候南飛鴈肯寄平安一紙無

陳端

以剡箋寄贈陳待詔

雲母光籠玉楮溫得來元自剡溪漬清涵天姥峰頭雪
潤帶金庭谷口雲九萬未充王內史百番聊贈杜叅軍
從知醉裏縱橫墨不到羊欣白練裙

張璨

紫虛觀

紫峰檀上鶴成群碧洞靈芝產石根雲引晝陰歸竹塢


水流春色出花源藥爐伏火仙留訣茶竈生煙客到門
欲就上清傳寶籙未知何日謝塵喧

西溪晚步

空濶川原入望平晚來天色弄陰晴虹邊殘雨疎疎下
鴉背斜陽閃閃明淺渚微波羣鷺浴斷堤高柳一蟬鳴
行吟澤畔非憔悴漁父無勞詠濯纓



御選明詩卷七十三



總校官庶吉士臣侍朝

校對官編修臣莫瞻菴

謄錄監生臣周翥華

欽定四庫全書薈要

集部

御選明詩卷七十四

詳校官原任主事臣
李斯咏

欽定四庫全書薈要卷一萬八千五百七十四

集部

御選明詩卷七十四

七言律詩七

徐璿

秋日江館寫懷

水國天寒樹影稀
西風又見鴈南飛
郢中白雪無人
和
湖上青山有夢歸
獨對浮雲傷往事
驚看秋草又斜暉
十年浪跡煙波外
滿眼塵氛未拂衣

朱純

遊絲

紫陌遙看一縷微
籠煙曳日轉依依
不隨蛛網縈鈿合
肯逐鸞梭上錦機
香冑落花低趁蝶
煖隨柔絮欲沾衣
無由繫得東君駕
空向春風上下飛

春詞

瑤瑟聲沉閉綠窗
月明空吠隔花虬
綵旂零落宜春字
綃帳低迴照夜缸
好夢每嫌鶯喚醒
傷心況對燕飛雙

奢雲豔雨情多少
遠逐楊花渡楚江

李昉

送春

強對東風酒一尊
留君無計黯消魂
綠波芳草汀邊路
飛絮殘陽柳外村
鶯倦語時渾寂寞
客傷離處又黃昏
寒燈孤館何曾寐
山雨瀟瀟獨閉門

賀承

湖鄉佳處為朱昌年賦

湖鄉佳處足幽栖
路入蒹葭望欲迷
一水遠連天上下
幾家如在灤東西
紅塵市迴人稀到
綠樹春深鳥自啼
何日編茅居此地
杏花春雨看扶犁

陳延齡

妙智寺

永安山高一萬丈
妙智寺建三千年
古澗泠泠瀝蒼雪
畫樓面面開青蓮
老猿果熟占一壑
怖鴿燈暝依諸天
老夫登臨發長嘯
風露滿身寒不眠

張振

貧居

青眼交游覺漸稀
側身天地可相依
若知白石真堪煮
何待黃精為療飢
已過禁煙無熟食
不因沽酒典春衣
蒼苔碧草侵階長
高卧空齋晝掩扉

楊範

鏡川

斜日一輪山上頭
輕霞片片漾波流
平蕪野岸碧千畝

喬木人家紅半樓沙鳥迴翔將下宿田夫被濯欲歸休
漁舟各已收緡去漸有燈明蘆荻洲

周德行

寄泮水諸公

早年曾許筆如杠老我於今興已降作客渾如錦江杜
攜家未遂鹿門龐沙鷗睡熟原相並梁燕飛來偶自雙
昨夜夢魂歸別墅富春山鎖白雲牕

許穆

送邵昇遠之官吉州

京華相見惜分攜
歌罷驪駒思欲迷
獨客自憐留日下
一官君喜向山西
天涯月落聞雞唱
驛路花開聽鳥啼
想得到州春未晚
柳條垂綠草初齊

沈貞

桃花渡

渡頭渾似曲江濱
誰種桃花隔世塵
紅雨綠波三月暮
暖風黃鳥數聲春
舟橫落日非無主
樹隔層霞不見人

幾欲前源訪仙跡迷茫何處問通津

得故人書

蕭蕭落葉蔽荒苔流水柴門晝始開
紫塞鴈從江上過故人書向日邊來
秋風客舍心千里夜雨燈窗看幾回
迢遞關河空念別何時能報一枝梅

吳淞漁樂

家住滄洲白鳥邊捕魚沽酒自年年
桃花浪暖堪垂釣楊柳風輕不繫船
帆影帶歸孤嶼月笛聲吹散一江煙

武陵亦是人間路誰說仙家別有天

沈恒

秋江送別為戴友諒賦

蕭蕭落葉早寒天忽送秋聲到耳邊
千里客心驚歲月五湖鄉夢入風煙
青山紅樹還家路綠水滄洲載酒船
夜半燈前對兒女白頭重話謫居年

歸鴈

冥鴻不覺又逢春遠別湘南北向秦雲
接斷行天漠漠

江涵歸影水粼粼
關山叫落三更月
旅館愁驚萬里人
莫怪東風催去翮
清秋蘆渚又來賓

錢暲

贈澄江周岐鳳

琴劍飄零西復東
舊遊清興幾時同
一身作客如張儉
四海何人是孔融
野寺鶯花春對酒
河橋風雨夜推蓬
機心盡付東流水
惟有家山在夢中

陳顥

竹西草堂為曹汝器賦

新構茅堂就竹西，渭川千畝共襟期。
清風埽榻秋來早，蒼雪團陰月到遲。
插棘每遮東面笋，脫巾還挂北邊枝。
尋君記得曾留宿，日出三竿尚不知。

題姜舜民竹深處次蘇雪溪韻

結茅竹裏似巖栖，面面窗開翠色迷。
長聽雨來虛榻外，不知日轉曲闌西。
奚奴埽地收新箨，吟客敲門看舊題。
幾欲相尋無路入，鷓鴣何處隔煙啼。

與賀文徵鴛湖痛飲聯句別後再用韻寄

鴛湖風日暖薰人行樂都忘俗事紛換酒主翁偏愛客
盍簪朋輩總能文新詞妙絕填金縷醉墨橫斜掃練裙
歸到寒齋枕書卧一燈夜雨正思君

題吳門趙時俊山樓文會圖

樓居百尺謝囂塵良會攀躋屬隱君望處有山皆入畫
坐中無客不能文一簾花氣香春酒半榻茶煙暝夕曛
自是高懷尚清事風流不羨醉紅裙

張慤

四月三日

未盡傷春酒一杯微風吹雨又南來
浮雲心事何曾定逝水年華更不回
數尺雞頭添穉竹一簾鼠耳長高槐
博山無火清香度何處薔薇昨夜開

贈天童詩僧讓公

自聞方外說天童夢繞青山十里松
珍重能詩老友遁尋常結社勝爐峰
傳書度海朝憑鶴擊鉢臨江夜擾龍

今日東風花縣裏解衣留得從容

張肯

送人之官嶺外

曉裝帶雪出吳門惜別休辭酒滿尊
邊徼一官同謫宦平安萬里即殊恩
月明好度梅花嶺雨過頻穿櫺葉村
想得龍城公退後故鄉風景與誰論

杜瓊

蘇臺別意送沈原還琴川

相逢未幾即思歸
忍聽朝來歌式微
綠酒數杯遊子去
青山百里故人稀
杏花微雨飄離席
楊柳東風拂釣磯
明日到家春正暖
袂除時節試春衣

秦旭

寄公祿

海內新詩久不聞
東樓高卧思紛紛
牕含竹色清如許
人比梅花瘦幾分
銀燭翠壺歌白苧
畫船春水載紅裙
昔年樂事俱陳迹
愁對孤燈更憶君

松菴避暑

秋燈禪榻鬢絲絲行樂鄉山也自宜
草閣共招溪上月
茶爐重和卷中詩牧之有意尋春早
靈運無緣入社遲
且與諸公相對飲風流不減會昌時

送人還京

青楓江上葉蕭蕭汴水淮雲去路遙
宮燭漸低鄉夢斷
家山將近客愁消霜寒鐵甕秋聞柝
月落揚州夜聽潮
厚祿故人如問我白頭甘作惠山樵

馬愉

題高漫士雲山圖

白雲縹緲亂山深，最喜幽居傍翠岑。
茅屋幾家松栝暗，石梯五丈薜蘿侵。
門前流水通南浦，邨外長橋接北林。
有客抱琴何處至，祇知來共歲寒心。

王澤

秋夕有懷

洛浦遺衾未可將，露蛩凝思滿中堂。
鵲橋已散銀河影，

鴈柱初傳玉宇涼
燈近暗窗星有燄
扇歸秋筍月無光
懷人不寐多惆悵
更耐悠悠漏點長

劉珏

荅陳醒菴

畫舫頻過柳外莊
南溪原得近東陽
風來絕澗水無迹
月到空山樹有光
愁裏得詩如老杜
醉中揮墨過顛張
別來兩月無清約
孤負寒梅一度香

寄沈同齋

藥闌花徑斷紅塵坐閱昇平五十春
繭紙有書皆晉體
錦囊無句不唐人
新圖寫就多酬客
美酒沽來只奉親
昨夜天涯憶君夢
西風吹過楚江濱

戴埴

送梁瑾赴春闈

江亭日落鷓鴣啼
酒盡沙頭惜解攜
離思不堪成去住
宦情無那易東西
清秋野戍聞寒角
殘月山城聽曉雞
明日思君還北望
暮雲煙樹總悽悽

張和

送龔進士文彥

雪後關河見鴈稀
感時傷別思依依
吳門煙月期同醉
天路雲山又獨歸
官驛暮帆和雨落
江城寒鳥背人飛
京華此去推先達
惆悵丘園只布衣

滄江送別劉習之廣西憲幕

秋波渺渺布帆輕
醉折蘋花贈遠行
萬里一官江上別
楚雲湘月客邊程
關門背嶺寒蕪綠
驛樹迎船瘴雨晴

此去蜚夷知有望使君心似玉壺清

訪曉菴禪師師以洞庭柑為供

十年不到白龍潭延慶名僧始一叅石鼎未烹陽羨茗
金盤先獻洞庭柑檐前暮雨霑天棘席外春風動石楠
明日又從江上別九峰惆悵隔晴嵐

倪謙

南郊草堂為陳天錫賦

選勝南郊結草堂幽清絕似午橋莊林鳩喚雨山光暝

畦稻舒花水氣長
攜酒秋清觀納稼
杖藜春晚看條桑
染盛獻享脩祠罷
合族筵開樂未央

韓雍

江行懷天全侗軒諸老

西江北塞嶺南孺
奔走風塵三十年
勇退未能心已倦
專征纔歇夢猶懸
自緣衰體纏多病
敢向明時話獨賢
苦憶鄉園諸大老
西風先泛五湖船

商輅

山水圖

雲山重疊樹高低
景色蒼茫望欲迷
江上有舟人蕩槳
林間無路石成蹊
柴門晝掩車塵杳
茅屋春來野鳥啼
昭代徵書勤束帛
高才未許學幽棲

送巡宰之莆田

與君兄弟意綢繆
不惜離筵重勸酬
紅葉馬前牽別恨
白雲江上動鄉愁
舟移劒水腥風遠
春到閩山瘴雨收
況是莆陽文獻地
宦情詩思兩悠悠

葉盛

題畫

綠樹青山漾碧流
畫中風景似揚州
隔江明滅漁人火
出岸高低估客舟
去燕來鴻千古事
閒花野草一春愁
不知誰在紅塵外
獨向蕃釐觀裏遊

劉昌

無題

玉鼎清香試水沉
湘簾如霧碧窗深
閒中次第占花信

夢裏分明見藁砧
臨鏡慵妝蟬鈿翠倚闌
失墮鳳釵金
東風一夜芭蕉綠
亦似含愁卷半心

閒門疎雨立清寒
羅帕無人借字看
草色天涯迷處所
花陰日午上闌干
春情不射屏中雀
秋影孤停鏡裏鸞
碧海茫茫空復夜
西風吹破爛銀盤

寄奚元啟顧文之二進士

天涯分手歎蹉跎
書劒功名近若何
上苑啼鶯春信早
楚江歸夢月明多
舊時詩社誰同飲
長日公庭客少過

此意蕭條總難寫東風腸斷一悲歌

邵伯宣

題徐景顏教諭澱江漁者卷

柯山青浸澱江波有客長年被綠蓑釣澤偶膺多士選
講帷仍賦散人歌桃花白鷺忘機久莼菜鱸魚入夢多
遲子束書歸舊隱水雲深處一經過

陳憲章

晨起將出尋梅

朝煙橫野犢鳴陂倚杖山齋睡起時
田父許留今日酒
梅花不欠去年詩
衝寒索笑來何處
帶病尋香出每遲
髣髴西湖夢中見
水邊籬落忽橫枝

重約馬默齋外海看山

春風擬進赤泥洲
曾約看山共此遊
落蕊忽過三月半
先生能復一來不
不堪老我癡猶在
且喜嬌兒病已瘳
想得渡頭楊柳樹
清陰閒弄釣魚舟

南歸途中先寄諸鄉友

不分賓主共林塘脫下朝衫作道裝酒為老夫開甕盎
茗和春露摘旗槍津頭水滿鴛鴦下牆背風來枳壳花
何處與君拚坐久萬株花裏小藜牀

元旦試筆

天上風雲慶會時廟謨爭遣草茅知鄰牆旋打娛賓酒
穉子齊歌樂歲詩老去又逢新歲月春來更有好花枝
晚風何處江樓笛吹到東溟月上時

飲酒

君莫停杯我為歌我今忘我是誰何避人嬾弄船頭笛
對影非無月下蓑廬阜春雲眠華嶽江門秋水釣銀河
竹弓挽住閒人手漸覺年來射鵰多

邀馬玄真

閒眠閒坐或閒行身老溪雲病亦輕客至正當秋釀熟
船來莫待晚潮生江河偶得三人對風月還添一榻清
數日前玄真送木榻昨日書來張主事頭顱空訝老無成

龍溪寄馬玄真

我家久住龍溪上說着龍溪便有情
荔子不將梨鬪美
沙螺羞與蟹爭衡
江村婦女蕉衫窄
市巷兒郎木屐輕
漫興詩多誰和我
樽前忙殺馬先生

種樹

早雨山泥滑
屐牙瘦
藤扶路入雲
斜東原綠映西原白
一徑松連兩徑花
寒夜試看殘月挂
東風須著短牆遮
江門亦是東門地
我獨何為不種瓜

次韻張叔亨宿別

春草江門綠兩涯隔江人唱浪淘沙好春剛到融融處
細雨初開淡淡花僻地豈堪留客久連牀端合拜君嘉
明朝愛得醅醕別笑脫藤蓑付酒家

九日和朱子韻示陳冕

正是詩忙酒亂時滿樓風雨不須歸碧苔院裏多秋色
紅樹溪邊又夕暉九日共餐花有菊暮年誰羨錦為衣
滄江野艇來何處遙望孤雲在翠微

劉珣

太常少卿陳維成致仕賦贈

帝城東下潞河流河上聊停范蠡舟
五斗直從今日醉一官還自老年休
白鷗喚醒紅塵夢鐵笛吹殘玉宇秋
白髮仙翁今在望江湖隨處即瀛洲

安溪僑叟為張檢討賦

溪上茆茨屋數椽春雩秋社自年年
牕含鰲背千峰雨簾捲波心萬頃煙
柳徑有時緣客埽竹牀長日抱雲眠
白頭自分無人識不解詩名到日邊

鄭文康

林東齋居

溪流一曲繞柴門屋後田園有路分
莊在輞川成故事客歸盤谷見遺文
借書夜讀三更火聽鳥春眠半榻雲
堪笑幾人雙健足每於城市報新聞

周鼎

甲午新歲九日臘盡

荼壘明朝滿市新一杯燈下舊吟身
流年細檢頒來歷

往事都成埽去塵薄有田廬聊卒歲可無溝壑尚遲春
殷勤照取田蠶看同是雞豚社裏人

郭登

普安道中

竹暗藤荒路欲迷一重山度一重溪
枯槎偃蹇如人立蠻語侏僂似鳥啼
花底雨晴飛蛺蝶水邊冬暖見虹霓
祇應風味堪題處三寸黃柑壓樹低

梅花鋪

綠樹冬深不怕霜，怪來風土說南方。
人經蠻寨愁蛇蠱，客聚盤江趁虎場。
翠黛插雲山似戟，黃流蒸氣水如湯。
王師到處霑恩澤，甘雨隨車洗瘴鄉。

永昌書事寄京中諸友

略說南方試靜聽，侏僂風俗盡堪驚。
花間蛩語春風暖，樹上蛙鳴夜雨晴。
孤嶺忽從天外出，瘴雲時向水邊生。
妖姬妝罷迎人笑，古帽長衫畫不成。

竹軒為阮公振賦

清嘯寥寥久不聞更開三徑避囂氛
白頭自擬存高節青眼相看獨此君
當戶碧雲晴裊裊隔簾蒼雪畫紛紛
如今林下閒人少每坐無言到日曛

又過鎮南州

萬里狼煙去復回征衫風露黯黃埃
一年寒食梨花近二月春晴燕子來
綠水亭前羅帶繞碧山窗外畫屏開
經過每愛弦歌宰驥足終非百里才

遊太華寺和素軒沐公春日韻

鷺渚鷗波接遠天
落花飛絮滿平川
春歸客夢偏驚雨
寒食僧家不禁煙
澗底泉聲消永日
階前草色換流年
何由近向東林住
常得尋師水石邊

寓溟陽寄京中友人

霜重梧桐葉漸飛
淺黃欺綠上荷衣
鱸肥江上秋將晚
酒熟山中客未歸
鄉夢夜長雞唱早
故人書遠鴈來稀
黃花兩負東籬約
空對西風賦式微

入緬取賊早發金沙江

征帆如箭鼓聲齊舟渡金沙更向西石棧夜添蠻雨滑
曉江晴壓瘴雲低水邊烏鬼迎人起竹裏青猿望客啼
又隔滇陽幾千里桐花榕葉晚淒淒

偶成寄彥謚

三歲春風客未歸邊城無事暫幽棲朱櫻映日枝頭滿
翠荇牽風水面齊老樹藏鴉添嫩葉舊巢歸燕補新泥
閒來漸有漁樵興更欲移居向瀼西

舟至高郵風氣尚暖

北地風高水欲冰
南方秋晚尚餘蒸
漁家香飯聞炊芡
溪女纖歌識採菱
鷺渚櫓搖歸夢客
柳汀舟渡夕陽僧
故鄉多少蓴鱸興
三十年來愧未能

秋日至城南草堂

渡水登山到草堂
田家香稻喜新嘗
牆邊薜荔秋多雨
池上天容夜有霜
看竹每尋扶老杖
借書先錄養生方
白頭自笑歸來客
況復江南是故鄉

和許太常道中家園成趣軒韻

君家三徑幾時開
千箇長松繞屋栽
釣每從溪上去
題詩還傍竹間來
夢闌石枕月相對
花落柴關風自推
有約頻過尋賀老
莫教空棹酒船回

甘州即事

黑河如帶向西來
河上邊城自漢開
山近四時常見雪
地寒終歲不聞雷
牦牛互市番氓出
宛馬臨關漢使回
東望玉京將萬里
雲霄何處是蓬萊

送岳季方承命釋累回京

早登黃閣贊經綸欲報君恩敢愛身
青海四年羈旅客
白頭雙淚倚門親
嗚珂又喜趨仙仗
補袞還思用舊臣
漫道歸來心便了
天涯多少未歸人

王肄

題沈孟淵江鄉深處二首

村西村北路相連處處桑麻綠野田一帶好山如畫裏
幾灣流水到門前漁歌唱過鷗邊月牧笛吹殘谷口煙
不獨仙緣異人境杏花春雨自江天

路入江鄉覓隱淪，遠隨流水度前津。
雲遮茅屋不知處，舟過柳橋方見人。
白鳥下汀芳杜雨，紫鱗吹浪落花春。
相逢說罷忘機事，一道香風起綠蘋。

龍瑄

客夜

寂寥孤館掩黃昏，滿抱羈愁誰與論。
時候早寒淮北地，田廬多潤海邊村。
天凝蜃氣朝猶暗，風雜潮聲夜復喧。
幾欲強眠不得，擁爐枯坐黯銷魂。

山居雪中

風抱茆檐雪擁門
山居寥落易黃昏
平頭踏凍春粳米
楫杓煨煙煮菜根
萬事由他愁不得
一寒如此樂猶存
清歡今夜須拚醉
傾倒何妨甕酒渾

荆山鄉思

驛廳長晝思依依
坐看晴檐柳絮飛
斜日烏呼春不住
東風鴈比客先歸
山程迢遞淹征轡
野水微茫夢釣磯
却憶舊居江口市
雨香蘋藻鱗魚肥

和南村春興

朝來攜杖到前溪，風暖花香滿袖攜。
郭索近晴穿草出，鉤輈長日隔林啼。
松陰野廟將春社，茆屋人家正午雞。
眼底韶光盡詩景，酒廬僧舍漫留題。

次沈陶菴題石田有竹莊韻

愛汝東莊多種竹，旁人錯認是湘川。
敲門僧立秋陰裏，避雨猿啼屋角邊。
最喜談詩揮白拂，閒因憩樹濯清泉。
相過定與髯張約，同掉輕舟破暝煙。

雪夜招文永嘉宗儒飲承宗儒和詩再答

同雲漠漠護深齋興到從教漏點催
寒色照人知霰集疎花有喜傍燈開
平生漫說詩千首一飲還能酒百杯
明日雪晴山滿目更開溪閣待君來

上元十三夜

近喜元宵雪更晴千門翠竹結高棚
珠簾半捲將圓月玉指初調未合笙
新放華燈連九陌舊傳金鑰啟重城
少年結伴嬉遊去遮莫雞聲下五更

十四夜

燈光漸比夜來饒
人海魚龍混暮潮
月照梅花青瑣闥
煙籠楊柳赤闌橋
鈿車過去拋珠果
寶騎重來聽玉簫
共約更深歸及早
大家明日看通宵

十五夜

一派春深送管弦
九衢燈燭上薰天
風回鰲背星球亂
雲散魚鱗璧月圓
逐陣馬翻塵似海
踏歌人盼夜如年
歸遲不屬金吾禁
爭覓遺簪與墜鈿

楊守陳

贈周廷參張邵齡二知己

客窗情思渺無涯
麥隴蔬畦浥露華
白屋三間連野寺
青苔一徑入鄰家
晴煙亂繞庭中樹
夜雨微沾戶外花
此地幽偏可乘興
馬蹄來去豈嫌賒

童軒

送張汝綸還雲間

不逐明時隱者流
觀光又到帝王州
匣中三尺馮驩劍

馬上千金季子裘呼酒長安歌夜月乘潮白下放歸舟
相思後日知何處吳地雲山是舊遊

春水

湖北湖南燕尾分半篙纔動綠如芸梅花港小依橋見
桃葉歌長隔岸聞細草斷冰鷗外浦斜陽晴笛鳥邊雲
晚來幾陣廉纖雨灑碎玻璃萬頃紋

中秋對月

吟倚南樓思爽然蟾光飛上一輪圓九霄清露溥金鏡

萬頃澄波泛白蓮
雲母屏開秋似練
水晶簾捲夜如年
何因得步臨臯下
喚起坡仙共泛船

簡溪為吏部吳主事題

溪上幽居敞竹扉
溪邊春水淨苔衣
吟鈔甫里新詩草
坐買嚴陵舊釣磯
幾點青山當戶立
一雙白鳥背人飛
也知習靜真成簡
游俠無勞問是非

送人還閩

鷗波新綠漲苔磯
有客都門賦式微
洛下布衣誰復薦

閩南山色又思歸江城雪後逢梅少野館春深見鴈稀
回首鳳皇臺下路夕陽新柳正依依

題江湖勝覽卷

雲臺煙閣總浮名自分江湖老此生木客峰前題句去
竹王祠下放歌行月臨僧寺寒鐘遠水落漁梁夜火明
幾度酒酣雙耳熱扣舷高詠不勝情

清明書感

兩年作縣越江湄回首鄉關未得歸華髮又驚佳節換

青雲堪歎故交稀
山村細雨梨花發
節屋東風燕子飛
潦倒不須嗟薄宦
且將尊酒送斜暉

秋夜夢康侍御用和

宦遊歲月易蹉跎
青鏡流光兩鬢皤
客夢不知江水遠
鄉心偏傍雨聲多
張衡有詠惟愁在
燭武無能奈老何
為問舊遊驄馬客
別來誰與共鳴珂

王越

獨坐感懷

倚徧曲闌愁似海滿庭風雨晝冥冥呼門有客憐孤注
競醉無人問獨醒離恨春隨芳草綠歸心暮入遠山青
舊時學得幽蘭操彈與鍾期一段聽

夜坐

感昔懷今坐夜深悠悠身世任浮沉三緘已錮金人口
百鍊難消鐵漢心春甕有天藏酒聖草堂無地著書淫
不知誰是鍾期耳乘月時來一賞音

村樂

愛飲村醪懶賦詩此中真趣有誰知
教成白鶴如人舞
買箇黃牛當馬騎
除草澗邊春意足
銜雲洞口夕陽遲
吟成獨坐空庭久
正是紗窗月上時

蜀中送項斯誠同年回京

白髮慈親七十餘
不知消息近何如
老來賴我供湯藥
別後憑誰奉板輿
旅館夜長頻有夢
故鄉路遠久無書
君歸正向門前過
為報平安莫倚閭

馬文升

秦隴道中

問俗昔曾過隴山西征今復出秦關
鴈聲呌日迷寒渚楓葉經霜帶醉顏
世路羊腸千里曲功名蝸角幾人閒
林間鸚鵡能言語笑我年來兩鬢斑

沈埭

題漁隱故居

名落人間二十年一溪漁隱自悠然
晚風楊柳堤邊笛秋雨蘆花渡口船
沽酒肯邀漁父醉枕蓑時伴野鷗眠

只今回首成陳跡贏得人稱似輞川

何喬新

登岳陽樓

雲窗月牖俯清流滿目山川快壯遊誰向江湖懷北闕
漫誇樓閣冠南州朱弦夜鼓湘靈瑟錦纜春回楚客舟
欲起靈均歌九辨澧蘭沅芷徧芳洲

謝省

荅編修姪次韻

江湖飄泊二毛初半世謀身智亦疎
春意欲歸彭澤柳年華未盡茂陵書
孤桐自覺非時調尺牘誰能問客居
須信人生身外事落花殘雨向春餘

張寧

送史明古過訪還吳江

一燈新火映鄰扉話盡殘更未解衣
元亮老嗟蕪業改無功生怯醉鄉非
天孤遠鴈和雲斷風急春潮帶雨飛
暫爾相逢便相別祇應清夢送君歸

杜庠

登滕王閣

滕王高閣壯洪都此景多應海內無山截地形橫隔岸
江流天影下平湖鳴鑾聲斷停歌舞蛺蝶香消冷畫圖
一片閒心誰解得白鷗飛入暝煙孤

夏正夫邀飲蛇酒

藤峽香醪遠寄來一尊公館晚涼開功同薏苡能消瘴
色勝葡萄乍潑醅錢在杖頭宜賸買壁懸弓影莫深猜

主人情重憐衰病入夜張燈再舉杯

寄吳中諸友

故園東望路綿綿一別何期竟隔年
客思半消春酒後鄉心多在夜燈前
杏花村店西山雨楊柳河橋上苑煙
欲語平安歸未得自嗟身為薄名牽

桑瑾

橫瀝口泊舟

浦外炊煙起柁牙岸頭茆屋是農家
一冬苦雨全無麥

二月春晴未見花
野渡至今濡馬足
江潮久不露鷗沙
閒隨漁父談占候
怕見朝霞愛暮霞

劉英

暮春陪陳太常西湖宴集

六橋柳色翠迷津
畫舫遲移送酒頻
醉眼不知三月暮
賞心又度一年春
鶯諧急管催歌板
燕蹴飛花墮舞裯
年少莫將行樂悞
坐中半是白頭人

春興

一天微雨送清明歲歲逢春不快晴近水人家多養鴨
依山樓閣早聞鶯子期不用黃金鑄顏駟空嗟白髮生
惟有東風一尊酒朝朝相對藥闌傾

次韻姚公綬舟中夜話

銀燭楸枰對弈碁烏絲繭紙更題詩月明鄰舫人眠早
鼓絕江城漏下遲斷飲頓忘犀首樂放懷偏笑虎頭癡
朝來欲別應難別未了山中笋蕨期

聶大年

余讀元人王仲蔚詩愛其楊柳青旗連坐榻杏
花春色過鄰牆之句惜無全章因足一律奉寄
施彥顯

夾城門外好風光曾醉君家碧玉觴楊柳青旗連坐榻
杏花春色過鄰牆迴鸞錦字新題句睡鴨銅爐小篆香
酩酊不辭歸路晚銀鞍驄馬映斜陽

錫山飲友人樓中臨別贈以詩

小樓燒燭了殘棋是我孤舟欲發時千里宦情雙鬢改

十年心事故人知
閒推甲子憐衰態
醉折名花續舊詩
無限西湖風月好
抱琴相訪莫教遲

蘇堤春曉

樹煙花霧遶堤沙
樓閣朦朧一半遮
三竺鐘聲催落月
六橋柳色帶棲鴉
綠窗睡覺聞啼鳥
綺閣妝殘喚賣花
遙望酒旗何處是
炊煙起處有人家

寄劉士亨

一樹櫻桃鳥啄殘
麥秋天氣尚輕寒
蠶登曲箔桑初盡

燕補新巢土未乾，囊裏古方閒。
自檢鏡中華髮老，羞看花時不共劉郎醉。
辜負東家芍藥闌。

澄江舟中留別故舊

雪後晴沙玉一坡，孤舟斜日奈愁何。
白頭宋玉偏能賦，紅袖吳姬最善歌。
笠澤暝煙連浦樹，惠山寒翠濕漁蓑。
傷心一帶梁溪水，添得征人別淚多。

劉溥

賦得石城暮雲送別

石城千仞鬱嵯峨城上春雲向晚多
薄映殘霞分雉堞
暝隨歸鳥渡龍河依依欲散風前角
幕幕猶停柳外歌
又逐行舟過江去相思回首奈愁何

春晚漫成

重城楊柳晝沉沉坐久黃鸝轉夕陰
幾處閒門芳草綠
一簾微雨落花深年光暗覺隨流水
春色長看滿上林
故國松篁還似舊莫教奔走負歸心

送徐仲吉赴任龍江

楊柳陰陰乳雀飛，
可堪相見復相違。
南風草色連江舍，
北闕鐘聲繞禁闈。
盛世一官隨處好，
故人千里幾時歸。
欲知後夜相思意，
疎雨寒松獨掩扉。

寄平江侯陳立卿

梧桐葉老菊花肥，
秋氣催寒及授衣。
青眼故人頻入夢，
白頭孤客未言歸。
江湖寂寂雙魚冷，
風雨淒淒一鴈飛。
尊酒論文久相約，
不堪時與素心違。

送盛御史祖巡按廣東

玉驄金廐下青霄
庾嶺南頭道路遙
霜葉定從行處落
瘴雲應向到時消
山雞吐繡風號雨
海蚌含珠月映潮
最喜送行冰雪霽
臺中老栢讓孤標

送錢理平還吳

江上蘆花似雪飛
玉京遊客正思歸
畫船載酒尋詩社
沙鳥衝人下釣磯
南浦早霜秋潦涸
西風殘照故山微
到家想見開筵處
翠竹黃花晚更輝

使回過獨石

斷腸君沒見君書

倣嚴武臨邊

少年騎馬耳生風老去羞無汗馬功
落日秋風心尚壯
令人回首望雲中

和韋蘇州荅中山道士

行轉清溪又別峰馬蹄終日認樸蹤
翠微深處無人住
寺在深山何處鐘

馬邑

天外亂山圍曠野水邊孤塔背層城馬頭才指桑乾路
愁見行人問去程

雞鳴山

煙蒸山腹晴猶濕河帶冰漸暖漸流獨上雞鳴看日出
五雲多處是皇州

盧溝

河分橋柱如瓜蔓路入都門似犬牙落日盧溝溝上柳
送人幾度出京華

北都小雪

邊城小雪試年華
煙冷貔貅十萬家
探使不來人半醉
將軍羶帳草平沙

雨晴二首

東風時送瓦溝聲
欹幽窓夢自驚
睡起不知雲已散
夕陽偏向柳梢明

一抹平林媚夕暉
山煙漠漠燕飛飛
倚闌遙認天邊電
何處行人帶雨歸

和舜元雜詩

瘦馬龍鍾兩鬢華
敲門避雨野人家
門前籬落猶懸露
十里晚風吹斷霞

三五殘星闕角東
澹黃楊柳月明中
貪看稚子收殘葉
駐馬天街滿袖風

撫州

蕭寺金風動剎竿
西城北斗挂闌干
一蟲不響夜更靜
片月未高山已寒

追和楊眉菴次韻李義山無題詩五首

蘭漿雙舫倚桂舟
隔花臨水思夷猶
香囊玉珮勞相贈
繡幄銀屏惜共留
愁繞鳳臺秦樹暝
夢回巫峽楚雲秋
多才苦被春情惱
鏡裏潘郎雪滿頭

行雨行雲少定蹤
夢回時節怕聞鐘
竹枝寄恨心偏嬾
桃葉題情意轉濃
香冷繡鞍閒騾裏
燭殘金障掩芙蓉
紅樓綠水無多遠
如隔江山幾萬重

纖纖斜日弄微風
腸斷仙山碧海東
鸞鏡有塵空自掩

鴈書無路若為通
愁橫柳葉眉顰翠
淚濕桃花臉暈紅
盡道芳年易憔悴
莫教青鬢作秋蓬

油壁香車幾度來
赤闌橋畔起驚雷
夢隨暮雨陽臺去
愁踏春波洛浦回
青鳥銜書通密意
綵鸞留詠惜奇才
苦心一寸如紅燭
總遣燒殘未作灰

瑣窗珠戶別離難
蘭蕙柔姿惜易殘
曲斷瑤箏銀甲冷
書留錦字墨花乾
羅衾積夢驚春晚
寶鴨銷香覺夜寒
檻外碧桃花自好
一年芳景共誰看

蘇平

送駱泰入蜀省兄

回首鵷原感別離，遠攜書劔上巴西。
雲深蜀魄呼名語，月冷猿聲向客啼。
諸葛祠堂春草沒，杜陵茅屋夕陽低。
相思亦有南來鴈，莫道音書嬾醉題。

送張景歸四明

萍水相逢此識君，天涯蹤跡又離羣。
夢隨海月鄉心遠，愁逐江流客路分。
極浦斷鴻驚暮雨，亂山孤騎入寒雲。

空齋別後門還掩詩酒何人話夕曛

送沈愚歸玉峰

皇州鶯囀柳條新客裏那堪此送君
歸夢不離吳苑月還家高卧玉峰雲
江村貰酒逢寒食驛路看山對夕曛
最是臨歧分手處落花離思共紛紛

秋夜與金璘秉貞同酌有懷沈愚

舊遊心事念多違此夕憐君扣竹扉
客裏清尊明月在山中白社故人稀
涼歸苑樹秋聲早漏盡江城燭影微

暢飲莫辭同一醉相思空遣淚沾衣

旅次清明

萬家煙樹散啼鴉上國清明好物華
滄海幾回驚節序東風隨處見鶯花
山迴鳳闕雲邊出柳帶龍旂雨外斜
欲醉芳尊消客況鵑聲落日在天涯

蘇正

秋日登臨

海外寒雲暝不開望秋閒上夕陽臺
江流東去疑天盡

山氣中浮覺雨來綠水平蕪孤鳥下白雲空處斷猿哀
臨高漫有滄洲想愁向西風見雁回

蘇直

送人東歸

東風官路柳依依目送鄉園賦式微晚渡雨晴孤櫂發
春江潮落遠人歸夢回野戍遙聞角家近滄洲獨掩扉
惆悵天涯同是客臨岐那忍又相違

晏鐸

登黃鶴樓

宦遊歲月易蹉跎對景其如感慨何黃鶴不來仙已去
古樓猶在客重過青山遠戍寒煙積芳草平洲夕照多
此日獨吟傷往事長江渺渺水空波

蔣主孝

送劉草牕原博北上

管庫誰憐有俊才買舟今日上燕臺繞堤江燕對人語
千樹野桃當午開使者再來顏闔去箭書初下魯連回

煩君此別須珍重莫遣兒童浪自猜

王淮

旅館書懷次韻

吹斷金猊一縷煙淒風忽到鬢毛邊
出門歎有千岐路負郭慚無二頃田
淺水乾蘆秋雨雁荒村病柳夕陽蟬
空牕獨掩黃昏後半壁寒燈對榻然

王貞度

清明日寫懷

地僻長時少送迎，坐看春色又清明。
傳家舊物青氍毹，在處世中年白髮生。
楊柳東風猶料峭，杏花疎雨半陰晴。
塞翁得失何須論，且共沙鷗暫結盟。

徐章

春日陪孟英陳先生遊橫山寺

嬾逐輪蹄走市塵，却來林下重盤旋。
天開圖畫丹青繞，嵐近樓臺紫翠連。
春水落花孤島外，夕陽歸鳥片帆前。
閒情不獨耽幽僻，為喜山僧似皎然。

盛箴

秋夜寓宿江寺

天涯歲晚倦宵征，望裏鄉山路幾程。
落日遠投江口寺，疎砧遙隔水邊城。
一身在客驚秋序，孤夢還家厭雨聲。
賴得遠公消此況，夜深香茗說無生。

張野

秋日有懷

雲散長天見晚霞，江濤千頃漾晴沙。
西風門巷飄桐葉，

疎雨園籬落豆花
笛韻已殘
漁罷釣砧聲初起
客思家
舊交契濶稀相見
閒倚西樓數去鴉

寂寂孤村獨掩扉
滿階荒草客來稀
秋霜未降蓮房老
社日初臨燕子歸
半壁燈光纔照字
一牕涼思又添衣
故人千里無書到
多少長天旅雁飛

呂伯剛

次韻滕至剛先生別後見寄之作

半山殘照獨回舟
一片閒雲任去留
水屋風簾餘晚興


雨花燈影共春秋從來養鶴山中住不學騎鯨海上遊
自此易知東浦路茆堂只在澗西頭

周傳

和鐵崖先生題黃子久畫

最愛山居養性靈空山為几翠為屏亂峰雨過雲猶合
小洞春深草更青對月漫題招鶴咏臨池常寫換鵝經
興來還解吹簫管有約離人夜半聽

御選明詩卷七十四



總校官庶吉士臣侍朝

校對官編修臣莫瞻菴

謄錄監生臣周翦華